

Deskobre Lalehan iha ó-nia laran

Oratóriu Fma/Sdb
Timor Leste

KARIDADE

Depois de Tempus Paskuál, ita ba fali Tempus bainbain, maibé la bele haluha esperiênsia forte Paskua nian no ba fali moris “bainbain” de’it, la’hó ksolok no domin. Iha fulan juñu ita Solenidade “Kristu nia Futar Fuan” ne’ebé halo ita hanoin ba domin ne’ebé Nia mate. Tan ne’e, atu hakle’an aspetu ida ne’e, durante fulan juñu no jullu, oratóriu nia atividade sira sei tulun ita atu komprende di’ak liu tan oinsá moris iha karidade.

Ó mak hahú hadomí? Entaun Maromak hahú horik iha ó!

S. Agostinho



ATIVIDADE: Presiza okulu?



Atu moris iha karidade presiza “okulu” ho lens moos... ne’ebé hatene haree ema seluk ho laran di’ak hodi deskobre buat di’ak hotu iha ema ida ne’e.

Bele halo nune’e: membru grupu nian tuur hodi forma kabuar ida; prepara surat-tahan ida ba membru ida ho ninia naran, hafoin entrega ba ninia na’in, ne’ebé sei lulun utoan nia parte iha okos, hafoin sei pasa ba sorin loos. Ida ne’ebé simu surat-tahan, hodi lee ema nia naran, sei hakerek ema ne’e nia karakteristika pozitiva ida iha okos, hafoin sei lulun utoan hodi pasa iha ninia sorin loos. Surat-tahan sira sei liu husi membru ida-idak to’o halo surat-tahan fila fali ba nia na’in. Husik momentu ruma nonok atu membru ida-idak bele lee buat ne’ebé kolega sira hanoin kona-ba nia no ninia di’ak.



Grupú karidade nian

Dala barak, iha ita-nia oratóriu sira, iha tempus Kuarezma hala’o atividade karidade nian, tuir espíritu Kuarezma nian, hafoin la halo buat seluk tan. Karik, bele hanoin atu hari’i grupu Karidade nian: oratorianu sira ne’ebé hakarak partisipa bele hili grupu nia naran, hakerek sira nia objetivu no programa, no marka bainhira sira bele hala’o sira-nia atividade.



Karidade... iha parokia

Iha ita-nia parokia sira iha grupu ruma (zeladór/a sira, katekista sira...) ne’ebé hala’o atividade karidade nian? Bele ba entrevista sira hodi hatene sira-nia atividade no hafoin bele hanoin oinsá kolabora ho sira, ka bele hakerek sira-nia atividade iha surat-tahan boot no tau iha parokia atu ema seluk bele envolve se hakarak.



JOGU: AMBULÁNSIA



Jezús, iha aknanoi kona-ba Samaritanu di’ak, hateten katak Samaritanu tau kurativu ba ema nia kanek, hafoin lori nia ba uma ida. fahe oratorianu sira ba grupu ho membru na’in 5. Hafoin marka dalan ne’ebé sira tenke halo, no grupu sei repete dalan ida ne’e ba dala 5 hodi troka malu: ida sei halo ema moras no sira na’in 4 seluk sei ko’us nia (ka kaer liman no ain) to’o pontu ne’ebé dalan hotu, hafoin sira troka, ida fali halo ema moras no na’in 4 seluk lori nia... halo nune’e to’o bainhira sira hotu halo ema moras. Hafoin sura grupu ida ne’ebé halo lalais liu ninia dalan



LORI PAUN



(Jogu ida ne’e bele uza paun baluk ruma, ka biskoite, ka surat-tahan ho dezeñu paun nian)

Fahe oratorianu ba grupu haat no halo grupu sira hamriik hodi forma quadradu ida; oratorianu ida-idak iha ninia numeru (hanesan bandera) no iha quadradu laran tau pedasu ida ka rua paun nian (ka biskoite 2).

Animadór sei bolu numeru ida no oratorianu sira ne’ebé iha numeru ida ne’ebá tenke hahú halai hodi haleu quadradu ne’e husi liur. Bainhira to’o ninia fatin nia sei tama quadradu laran hodi foti paun baluk ida (grupu 1 ka 2 de’it sei hetan). Sira lori paun ba grupu nia fatin no hahú fali ho animadór ne’ebé sei bolu numeru seluk. Molok hahú bele decide halimar minutu hira, ka animadór sei bolu dala hira (dala 20 ka 30). Bainhira hotu bele sura paun ne’ebé grupu ida-idak rai... se paun ka biskoite duni, grupu bele halo merenda!



FILME



Ba tempu ida ne'e duke haree, hanesan bainbain, santu ida nia istória, ami propoin atu haree filme badak ida kona-ba akontesimentu ida ne'ebé hakarak hanorin buat ruma kona-ba karidade. Tinan kotuk ema barak liu tama iha Youtube atu haree filem badak ida ne'e husi Tailandia. Ho labarik sira bele reflete katak bainhira ita halo hahalok ruma karidade nian, maski founoun parese katak ita la simu buat ida, iha Maromak nia planu hahalok ida ne'e sei sura ba ita-nia di'ak. <https://www.youtube.com/watch?v=6i5UGjFOX7g>



ISTÓRIA 2



Tinan barak liu ba, iha Inglaterra iha ferik kiak ida, ho hatais ne'ebé nakles, loron ida nia liu iha knua ida nia dalan, nia dere odamatan sira hodi husu esmola. Ema barak hatán ba nia ho liafuan aat sira, balun uza sira-nia asu atu duni nia, balun fó ba nia modo nia kulit, balun paun ho kulapur, toos ona. Maibé to'o uma ki'ik ida, nia hetan katuas no ferik ida ne'ebé halo nia tama iha uma laran. Katuas dehan ba nia: "Mai, tuur lai, hamanas ó-nia isin, no nia feen prepara ba ferik paun mamar ida no susubeen. Bainhira ferik hahú han, sira na'in rua ko'alia ba nia ho lian midar no fó konsolasaun ba nia.

Loron tuir mai, liurai nia atan ida mai konvida povu tomak atu partisipa ba festa iha liurai nia uma. Sira hotu hatais di'ak no tama iha kuartu boot ida iha ne'ebé prepara ona kadeira ba sira ida-idak. Liurai nia atan sira, mai hodi lori aihan: sira fakar modo nia kulit, fatuk sira no paun ho kulapur iha ema nia bikan. Sira hotu hahú murmura, liuliu tanba iha katuas no ferik ida nia bikan atan sira tau aihan midar no furak tebes. Teki-teki, tama iha salaun ferik kiak ne'ebé loron antes dere sira-nia odamatan: sira hotu hakfodak! Ferik dehan: "Ohin imi simu buat ne'ebé horseik imi fó mai ha'u", kolu tiha hatais foer ne'e, nia hatais vestidu osan mean nian: nia mak Liurai Feto.



Katuas riku ida mate no sa'e ba Lalehan. Nia la'o iha Lalehan nia merkadu no haree sasán furak tebes ho prezu baratu liu. Nia hakfodak no foti ninia kartera hodi hahú husu sasán ne'ebé di'ak liu. Hafoin nia hakbesik banku atu selu no tau iha mesa osan boot. Anju ne'ebé tuur iha ne'ebá hamnasa midar ba nia no dehan: "Osan sira ne'e la iha folin iha ne'e". Ema riku simu hodi hatán: "Nusá?"

Anju esplika ba nia: "Iha ne'e, ami simu de'it osan ne'ebé señor haraik ba ema ne'ebé presiza, bainhira moris iha rai". Imi keta haluha: hahú hanoin ba "kapitál" iha Lalehan!



SANTU SALEZIANU: SIMONE SRUGI nia karidade



Simone Srugi mak irmaun salesianu ida ne'ebé hala'o ninia atividade apostolika iha Israel. Bainhira Funu Mundiál dahuluk hotu ona, superiór sira entrega ba nia responsabilidade fatin iha ne'ebé agrikultór sira husi knua 50, lori sira-nia trigu. Fatin ne'ebá mak fatin enkontru nian, fatin fila liman nian, maibé mós fatin istori malu nian, to'o violénsia. Lalais ema hotu hatene ir. Srugi; sira dehan "Nia mak aman ida ba ema hotu", nia serbisu nonok, hodi la sura kole, hodi halo kontratu ne'ebé loos no tulun ema hotu bainhira iha problema ruma. Neineik, fatin ida ne'ebá sai hanesan fatin família nian, Simone sai ema hotu nia atan, liuliu musulmanu sira nian ne'ebé nia respeita no hadomi ho fuan loos. Nia hakerek: "Ha'u sei haka'as an atu la halo sala ida, maski ki'ik, liuliu atu la lakon pasiénsia no la rai vingansa". "Terus ba buat hotu, no hodi nonok, tahan buat hotu".

Liuliu, Simone tau matan ba foin-sa'e sira, hodi hatudu ba sira domin aman nian: "Sira mak ki'ik, sira mak labarik kiak; ita presiza hola sira-nia aman-inan sira nia fatin. Ita presiza tulun sira, korije sira se sira sala, maibé hodi la halo sira sai satiadu atu sira la hanoin atu halai. Ita tenke eduka sira laho ho aitonka, laho liman ka ain sira, laho nanal kro'at..."

"Buat di'ak ida bele mai husi Nazaret", Simone halimar ho Evanjellu nia fraze ida ne'e no nia dehan katak nia la vale buat ida, nia saran buat hotu iha Maromak nia liman... maski nune'e, bainhira Reito Mor, Miguel Rua, ba vizita rai Israel, nia rekomena ba salezianu sira atu hakerek buat hotu ne'ebé Simone halo, tanba nia fó sasin furak ida kona-ba haraik an no karidade.

Simone hala'o dalan santidade nian hodi heli an, fiel ba atividade loron-loron nian, nia hakerek: "Hadomi Maromak katak ita la fó ba Nia susar ida, nein ho hanoin sira, nein ho liafuan sira, nein ho hahalok sira, maibé hodi hadomi liu ha'u-nia Maromak ne'ebé hatudu domin boot mai ha'u". Musulmanu ida fó sasin: "Srugi mak ema fiel ba ninia relijiaun no respeita relijaiun seluk. Nia tau kurativu ba ema sira no "Allah" gia nia liman. Maski aban bairua sei mosu dotor espertu ida, ema ida sei la ba simu tratamentu husi nia. Srugi hanesan kopu banibeen nian. Iha ninia liman iha Allah nia perfeisaun. Nia ulun nakonu ho Lalehan. Tuir "Allah", iha de'it Srugi!"



ORASAUN



Bainhira ita ko'alia kona-ba karidade, ita hotu hanoin kedas ba S. Paulo nia hino (1Kor 13) iha ne'ebé ho fraze konkretu sira, nia esplika saida mak karidade ba povu ne'ebé hela iha Korintu. Ita bele lee fali hodi para ba fraze ida-idak no husu ba oratorianu sira atu harohan ba ema ruma (konforme fraze ne'ebé lee), ka husu ba Maromak atu haraik attitude sira ne'ebé presiza atu moris tuir buat ne'ebé s. Paulo hakerek.